

Kutip 11,000 kilogram sampah di perairan PD

UM 3/8/2024 P9 35



SEBAHAGIAN penyelam menunjukkan antara sampah dan pukot hantu yang berjaya dikutip di dasar laut sempena Program Pemuliharaan Biodiversiti Marin Port Dickson di Pantai Tanjung Biru, Port Dickson semalam. - UTUSAN/MOHD. SHAHJEHAN MAAMIN

PORT DICKSON: Puluhan penyelam yang bergerak secara sukarela membersihkan dasar laut di perairan dan pesisir pantai di Port Dickson di sini mengumpul sehingga 11,000 kilogram sampah sejak awal tahun lalu sehingga Julai lalu.

Aktivis alam sekitar, Noor Fadzli Shah berkata, sekitar 20 hingga 40 penyelam melaksanakan tugas sukarela itu bagi setiap sesi sekurang-kurangnya sekali pada setiap bulan.

Menurutnya, tumpuan penyelam adalah untuk membersihkan dasar laut di perairan berhampiran Pantai Tanjung Biru, Pantai Cermin dan Tanjung Tuan yang terletak berhampiran antara satu sama lain.

Ia memandangkan lokasi tersebut merupakan satu-satu-

nya di Selat Melaka yang mempunyai khazanah batu karang.

“Jenis-jenis sampah kebiasaannya plastik dan botol air yang paling banyak. Walaupun sisa ini tidak banyak ditemukan, namun kita tidak mahu ia berada di perairan kerana bahan mengandungi merkuri dan mampu memberi kesan kepada hidupan di laut.

“Ini terutamanya hidupan laut yang mempunyai bercengkerang. Oleh itu, kita akan sentiasa melaksanakan program pembersihan ini bagi menjaga khazanah alam terutamanya yang terdapat di perairan Tanjung Tuan ini selain melipatgandakan usaha menanam serta memulihara pokok bakau.

“Kami juga berbesar hati apabila aktiviti pembersihan pantai

dan dasar laut ini akan menjadi acara tahunan dalam kalender pelancongan Negeri Sembilan pada tahun hadapan,” katanya.

Pengarah Perikanan Negeri Sembilan, Kasim Tawe dalam pada itu berkata, Tanjung Tuan adalah lokasi paling unik kerana ia satu-satunya kawasan tepian tanah besar Semenanjung Malaysia yang mempunyai terumbu karang yang cantik dan pelbagai spesies hidupan marin.

Menurutnya, spesies hidupan marin itu termasuk ikan-ikan karang, tumbuhan akuatik (latok), penyu dan mamalia akuatik.

“Port Dickson yang terkenal sebagai pusat pelancongan juga menjadi lokasi selam yang menarik berikutan adanya kepelbagaian terumbu karang yang cantik ini” katanya.